

Jednostavniji ulazak kapitala u Federaciju BiH Strik i Dejvidson ruše barijere investitorima

Od federalne Vlade se traži usklađivanje poreskog sistema i skraćivanje procedure registracija inostranih kompanija u Bosni i Hercegovini

Pregovori o usklađivanju poreskog sistema Federacije BiH i Republike Srpske, na kojem je insistiralo Vijeće stranih investitora u BiH, nastavit će se iduće sedmice, saznaje "Oslobođenje".

Premijer FBiH Nedžad Branković je za razgovore sa ovim vijećem ovlastio svog savjetnika za ekonomska pitanja, privatizaciju, strana ulaganja i investicije Fuada Strika, koji će iduće sedmice sa predsjednikom Vijeća Markom Dejvidsonom (Mark Davidson) imati novi sastanak. Strik nam je u utorak rekao da se od drugog sastanka očekuju konkretniji zaključci.

Konkretni koraci

"Ujednačavanje poreskog sistema je prva i ključna stvar koja interesuje strane investitore. Razgovarat ćemo i o skraćivanju rokova za registraciju inostranih firmi u BiH, koju strane investitore naročito zanima."

Ovo će biti drugi sastanak predstavnika Vijeća stranih investitora u BiH i federalnih zvaničnika. Prvi sastanak, koji je održan prije 15 dana, bio je prekratak da bi polučio vidljive rezultate, a od ovog se očekuje mnogo više. Zaključke novog sastanka će Vlada FBiH ponovo analizirati, pa je nakon toga za očekivati i neke konkretnije korake Brankovićeve vlade:

"Mislim da je interes cijele BiH, pa tako i FBiH da po-



Fuad Strik: Potreban nam je veliki investicioni ciklus

mogne investicije, a pogotovo inostrane. Potreban nam je veliki investicioni ciklus, poput onog koji se trenutno dešava u Sarajevu na polju građevine.

Kada takav ciklus otvorimo u cijeloj BiH, imat ćemo razloga za zadovoljstvo", istaknuo je Strik.

Vijeće stranih investitora BiH je osnovano prije godinu uz pomoć Američke agencije za međunarodni razvoj (USAID), a čini ga 13 inostranih firmi u BiH. U Vijeću stranih investitora su firme koje su direktnim ulaganjima otvorile veliki broj radnih mjesta, čime su doprinijele ekonomskom razvoju BiH. Na čelu ove organizacije je Mark Dej-

vidson iz kompanije "Prajs Voterhaus Kupers" (Price Waterhouse Coopers), a osnovni cilj Vijeća je poboljšanje klime za veće strane investicije u BiH.

Poboljšanje klime

Tu klimu najviše narušavaju nejednake poreske stope u dva bh. entiteta, kao i dugotrajne procedure registracija firmi koje su se ispred stranih investitora postavile kao gotovo neprelazan zid. Strani investitori su sve što im smeta objavili u takozvanoj bijeloj knjizi, s kojom su prije dva-tri mjeseca upoznali sve razine vlasti u BiH.

Darko OMERAGIĆ

Foto: A. KAJMOVIĆ